

# Danunder vegn Mitt Romney?

La cretta influenzescha la visiun geopolitica

■ (gsc) **La Partida republicana dals Stadis unids ha gist elegì Mitt Romney (\* 1947), anteriur guvernatur da Massachusetts, per candidar ils 6 da november cunter Barack Obama, president dal pajais dapi 2009. Tenor ils davos sondagis da l'opiniun publica na pon ins tuttina betg dir tgenin dals candidats vegnia a gudagnar.** Pir ils proxims dus mais duain decider. Igl è cler ch'il pievel tscherna tenor criteris da politica interna e ch'il svilup da la situaziun economica vegn ad influenzer la decisiun. Ma nus en Europa resguardain cunzunt las consequenzas pussaivlas da l'elecziun per la politica globala da la superpussanza cun passa 300 milliuns olmas. Quai vala era per pajais sco la Svizra, l'Austria e la Svezia che na fan betg part da l'allianza atlantica. Quai vala tant pli per pajais situads damanaivel da nus, ma cun problems economics pli stringents, sco quels da l'Africa islamica a sid dal Mar mediterranean. Ins po insumma sa dumandar tge che l'elecziun da Romney muntass u pudess muntar per ils pajais situads da la vart ost da l'Ocean atlantic.

## In mormon per la Chasa alva

In schurnalist svizzer renumà ha già scuvert tendenzas da Romney areguard l'Europa ed il Proxim Orient. En «L'Hebdo» (Losanna) dals 30 d'avust 2012 ha Jacques Pilet entitulà sia «chronique» (p. 45): «D'ouè vient et ouè va Romney?» El scriva: «Scheffs da stadi, sco mintga uman, èn bullads da lur giuventegna en lur concepziun dal mund. I l'han lura sviluppada cun l'experien-



Mitt Romney, il candidat republican per il presidi dals Stadis Unids.

KEYSTONE

tscha, ma l'entschatta paisa (...). Tschertas biografias sbozzan gia in program politic – uschia era quel da Romney. Quel um, cun vistas da vegnir president dals Stadis unids, ha bavi l'aua da duas funtaunas ('deux mamelles'): La religiuon ed

il possess (...). Sco figl d'ina famiglia ritga ha'l sa deditgà ad affars finansials cun premura e success. Sia societad d'investiziuns ha salvà u terrà tschients fatschentas. Sia facultad duai importar oz var 250 milliuns dollars; tiers vegnan las

summas zuppadas da l'evasiuon fiscala vers las Inslas Cayman [a sid da Cuba] e la Svizra (...). Dapi sia giuventegna è Romney famigliarisà cun manaschis bancaris (...). Ma la fundamenta da sia personalitad è francada en sia appartegnentscha a la confessiuon mormona.» Dapi l'olimpiada d'enviern 2002 enconusch'ins Salt Lake City, center da la «Baselgia da Jesus Cristus dals sontgs dals davos dis» e chapitala dal stadi federativ d'Utah (2 763 885 olmas) a vest da las Rocky Mountains. Lezza Baselgia è persvasa d'esser l'unica veritabla e refusescha perquai mintga ecumenissem religius. Ella stimulescha ils giuvens ad ir a predgar l'evangelii cun almain 19 onns, durant dus onns, senza vacanzas. Centers da furmaziuon missiunara als preparan a lezza incumbenza ed als mussan da predgar e da discurren la lingua dal pajais nua ch'ins vul als trametter; il center missiunari mormon dals Stadis unids è situà a Provo (Utah) sper l'Universitad da la Baselgia. Ins renconuscha tgunsch lezs missiunaris, adina mintgamai dus, grazia a lur vestgì classic stgir, cun chamischa alva e cravatta. Lur vita missiunara è organisada rigurusamain, cun reglamaint ed uraris precis, planificaziun, rapports euv. Quai ha fatg atras Mitt Romney en Aquitania e lur a Paris (1966–1968). Jacques Pilet: «Persvader la glied da Bordeaux a renunziar a l'alcohol, tge ambiziun!» Mormonas e mormons duain renunziar al tubac, a l'alcohol ed a la vita sexuala illegitima; era perquai cumparan missiunaris adina en dus che n'astgan s'enclegia betg esser omosexuals.

## «Il maun da Dieu»

Mormonas e mormons han in problem politic areguard la Palestina. Sco cristians fundamentalists èni persvas che Dieu haja regalà lez pajais per adina al pievel giudaic. En ils Stadis unids fani pia part da la pussanta lobi da l'Israel che sustegna la colonisaziun giudaica en Palestina. Durant sia visita a Jerusalem en fanadur 2012 ha Romney declerà che l'Israel prospereschia meglier che la Palestina araba grazia a «the hand of Providence», pia il maun da Dieu. Pilet: «Ins sa pia che Romney sco president sustegness l'Israel totalmain, senza cundiziuns e schizunt misticamain (...).

Il mund stuess quintar cun in devoziun fanatic sco schef da la superpussanza da l'occident (...). Ins astga pia temair conflicts relativs.» «Le Monde» (Paris) dals 2 da settember 2012 entitulescha ses editorial senza sutscriziun (p. 1) sco suonda: «La main miraculeuse de Mitt Romney». I tuna: «El empermetta (...) da 'revocar las reduziuns irresponsablas d'Obama tar la defaissa naziunala'. Quai duaja metter puspè ad ir plazzas da lavur, sco er la pussanza da l'America, quel far dal mund (...). Romney è conservativ extrem areguard la politica exteriura (...). El reflectescha ina part relevanta da la societad americana, preoccupada dal svilup global e che siemia vairamain d'ina 'restauraziun'. Il rest dal mund po mo sperar che lezza part da l'America na survegnia betg la pussanza la saira dals 6 da november.»